

Gran cantor di pueblo Vicente Kelly a fayece Diasabra mainta




ORANJESTAD (AAN): Diasabra mainta famia y pueblo di Aruba a ricibi e noticia lamentabel cu e gran artista stima Vicente Kelly a bay sosega. Na un edad respeta di 69 aña Vicente a pasa su ultimo tempo na Huize Maris Stella na Savaneta.

Vicente Kelly ta un legendario musico y compositor cu a significa hopi pa e cultura di Aruba. Conoci pa su forma unico di toca cu acordeon el a alegra hopi generacion. Su composicionan semper a hala atencion sea pa ilustra su amor pa e isla di Aruba of pa tin letranan chistoso.

Vicente hunto cu su bandanan; Los Juveniles, La Nueva Fuerza y Los Pimentosos pa hopi generacion a participa na varios festival y a toca na centenares di fiesta y concierto. Den exterior tambe Vicente a sa di gana curason di hopi cu su presentacionan unda semper a la hiba Aruba su nomber den su curason.

“E Cantor di Pueblo”, considera como Aruba su Leyenda Musico, Embahador di nos Musica Cultural a marca historia na 1994 representando Aruba cu su orquesta “Los Pimentosos” durante e prestigioso Festival di Vallenato na



Valledupar, Colombia.

Durante su trayectoria musical formando parti di su tres orquestanan, Los Juveniles, La Nueva Fuerza y Los Pimentosos, Vicente Kelly a produci cancionnan cu a bira hitnan inmortal manera entre otro: “Mi Soño”, “Polin tin 7 buraco”, “Den Scochi bo Mama”, “Mi Chalapi bieu”, “Santa Cruz”, “Djaca den trampa”, y mucho mas.

Cu e cancion super clasico “Mi Banana” hunto cu e cantante Willy Polanco, Vicente Kelly y La



Nueva Fuerza a conquista logronan internacional, cu te hasta e popular merengero dominicano Fernando Villalona a reproducir y a cosecha un exito grandi rond Mundo.

Tambe e hit inmortal “Den Scochi bo Mama” a ser reproducir pa Doble R y a bira un super hit rond Antiyas.

Como tata tambe Vicente tabata un homber cu semper a stima su yuinan y e dedica tempo na cada un di nan talentonan. Vicente ta

tata di Carolyn Kelly, Elton Kelly, Reynold Kelly y Ariane Ojeda Kelly. E tabata tin un total di 8 nieto y nieta y ta casa cu señora Elvia Kelly.

Aruba sigur lo sinti falta di un baluarte di nos cultura. DIARIO a compronde cu den e siguiente dianan lo comparti e detayenan pa cu e forma cu lo despidi di Vicente.

Cu Vicente descansa na paz. DIARIO ta manda palabra di condolencia na famianan.